

## Lingua galega. Crónica e literatura

A)

Creación dun romance (as cuestións métricas poden flexibilizarse) sobre un feito con valor histórico-social de actualidade: a emigración, os desafiuzamentos, as estafas das preferentes...

Trátase, non de argumentar, senón de **narrar un suceso real** significativo de xeito vivencial, achegando tamén valoracións. Situádevos **como testemuña ou participante** nos feitos, pois a voz poética será a de alguén implicado.

Unha proposta sobre crónica xornalística:

**D**ende as 19:30 horas, os aforristas que ocupan dende hai seis meses o Concello de Gondomar en reclamo da devolución dos seus cartos atrapados nas caixas galegas, reciben o apoio das plataformas do Condado - Paradanta, O Salnés, Baixo Miño, O Rosal (desaloxados esta mañá do Concello que ocupaban), e de centos de afectados e veciños do Val Miñor. O xa tradicional “concerto” de pitos e bucinas acompaña a marcha xunto con consignas nas que piden ás autoridades que obriguen os bancos a devolver a totalidade dos cartos roubados aos aforristas. (...)

Escóllense **momentos concretos** para **distribuílos en estrofas** (haberá que construír catro ou cinco, como mínimo).

Ao redactar, inseríranse algúns dos **recursos** vistos (especialmente anáfora, reduplicación e antítese) coa intención de achegar viveza e/ou dramatismo. Por exemplo, unha anáfora:

atrapados nas súas caixas, / atrapados por cobiza.

Algunhas estrofas do texto *Saqueo de Cangas polos turcos* tomaranse como **modelo para incorporalas** modificando antes os elementos léxicos:

I os mouros arrenegados  
foron detrás lonxe, lonxe,  
i aqueles penedos arrodeados  
era moi lonxe, lonxe, lonxe

→

E os banqueiros forrados  
.....

Probes de nós! todos berraban  
ala moi lonxe, lonxe, lonxe,  
válenos, Cristo! apelidaban  
era moi lonxe, lonxe, lonxe.

Quen fora galgo  
quen fora páxaro,  
quen fora vento!

## Lingua galega. Crónica e literatura

B)

Creación dunha crónica de prensa a partir dun texto literario da Idade Moderna, dos Séculos Escuros.

Escóllese un poema circunstancial e extráense os feitos que recolle, aos que podemos sumar datos transmitidos pola historia. Textos propostos (partirase de un):

Feitos históricos de “Saqueo de Cangas...”	Feitos históricos de “Pranto da Frouseira”
Chegan os turcos. Os veciños foxen, escapan co altar ao monte. Os atacantes arrasaron a vila, fan pillaxe, perseguen os que foxen. Os escapados láianse e rezan ante a persecución. Agachados nos penedos, ven como se aproximan os turcos e como saquean. Estes vanse e a xente queda aliviada.	Pardo de Cela resiste na Frouseira os ataques de Mudarra, enviado polos RRCC.. Tras meses sen poder someter o mariscal, será a traizón - “os vinte e dous” – o que permita prender a Pardo de Cela, que será executado xunto co seu fillo. A fortaleza derrúbase por orde da corte de Castela e a filla do mariscal herda as súas terras.
Expresións valorativas de cada un dos textos que convén incorporar	
Aqueles homes eran uns demos Todo arrasaron	O vilán que o vendeu Traidores por mala intención

É fundamental contar eses feitos como se acontecesen onte mesmo. Farase xornalisticamente, seguindo o esquema da crónica.

**Titular** (máis ben rechamente)

**Entrada.**

**Corpo** con parágrafos enfiados e seguindo unha orde cronolóxica. Incorporación de citas literais de protagonistas e marcas de subxectividade (expresións valorativas).

**Peche.**

Máis datos históricos.

Nos primeiros días do mes de decembro do ano 1617 e despois de teren realizado unha serie de ataques contra Vigo e os arredores, once naves de piratas turco-berberiscos diríxense cara a outra beira da Ría: desembarcan primeiramente en Domaio, onde os paisanos son obrigados a fuxir ante a superioridade numérica e de medios dos atacantes, deixando detrás súa sete vítimas mortais, entre os que figuraban Antón Soliño e Pedro Barba, irmán e home, respectivamente, de María Soliño.

Despois de saquear e queimar a parroquia de Domaio, fondean para pasaren a noite fronte á Vila de Cangas. A mañá seguinte efectúan, apoiados pola artillería das naves, un desembarco por dous puntos: pola praia de Rodeira e por punta Balea. Os piratas apodéranse rapidamente da Vila, chegando nas súas incursións ata Darbo, queimando todo que topaban ao seu paso: Hospital, Colexiata, igrexa de Darbo, as principais casas, etc. Ademais da enorme perda material e en vidas humanas que supuxo o asalto, hai que salientar a grande cantidade de cativos que foron trasladados a Arxel para esixir un rescate pola súa liberdade.

Pero Pardo de Cela Aguiar e Ribadeneyra vive nunha época na que casteláns e galegos loitaban pola sucesión do poder político. Por unha banda, os galegos recoñecían como raíña a Xoana A Beltranexa e, pola outra, os casteláns defendían o reinado dos Reis Católicos, que procederon á anexión do Reino de Galicia. Pardo de Cela declarouse fiel ao Reino de Galicia e rebelouse contra a submisión aos Reis Católicos. Prodúcese entón o envío dun novo exército formado polas tropas de Acuña e Chinchilla, dando comezo a unha loita que durou uns 3 anos. Comezaba o que se deu en chamar como "a doma e castración do Reino de Galicia".

Acuña subornou a uns vasallos de Pardo de Cela, que lle abriron as portas da Frouseira. O mariscal é condenado a morte. A súa dona, curmá da raíña Isabel, consegue o perdón para el, pero os homes do bispo de Mondoñedo entretéñena na ponte da pasaxe mentres o seu home é axustizado xunto co seu fillo diante da catedral de Mondoñedo.